

**ROSA ANA PRADA QUEIPO, SECRETARIA DO CONCELLO DE AMES NA
PROVINCIA DA CORUÑA**

CERTIFICO: QUE O PLENO DESTE CONCELLO LEVOU A CABO SESIÓN ORDINARIA O 30 DE ABRIL DE 2015, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE:

**ACTA DA SESIÓN ORDINARIA LEVADA A CABO POLO PLENO DO CONCELLO O
DÍA 30 DE ABRIL DE 2015.**

No Salón de Sesiões da Casa do Concello de Ames, ás vinte horas (20:00) do día 30 de abril de 2015, reúnese o Pleno do Concello en sesión ordinaria de primeira convocatoria, baixo a presidencia do señor alcalde, **Santiago V. Amor Barreiro**, e coa asistencia das/os señoras/os concelleiras/os seguintes:

Grupo municipal Popular	Grupo municipal Socialista	Concelleiras/os non adscritas/os
Santiago V. Amor Barreiro Alfredo Taboada Alvelo Ana Ruso Valiña Ramón Senra Ríos	José M. Miñones Conde José Blas García Piñeiro Mª Isabel González Cancela Begoña Gómez Barreiro Francisco Villaverde Marcos	Xosé Anxo Doval Rey Susana Mayo Redondo Mª Pilar Candocia Pita Olalla Alvite del Río Ramón García Argibay Mª Dolores Fernández Álvarez Manuel J. Ferreiro Santiago María González Gómez Emilio Martínez Carballeira

Non asiste, pero xustifica a súa ausencia, o concelleiro José Pazos Balsa.

Non asiste o **interventor**, José Antonio Rueda de Valenzuela.

Actúa como **secretaria** a titular da Corporación, Rosa Ana Prada Queipo.

ORDE DO DÍA**Punto Primeiro.- Toma de posesión como concelleiro de José Fuentes Lamas.**

Informa o señor alcalde, **Santiago V. Amor Barreiro**, que o Pleno da Corporación en sesión celebrada o 26 de marzo 2015, tomou coñecemento da renuncia ao cargo de concelleira de Mª Eugenia Martín Vicente, pertencente ao Grupo Municipal Popular, así como da renuncia anticipada a cubrir a vacante dos seguintes candidatos na lista na que se produciu a vacante, Camilo Rico Martínez e Alfredo Manuel Campos Lago.

Informa que foi solicitada á Xunta Electoral Central a expedición da credencial a favor do seguinte candidato da lista na que se produciu a vacante que resultou ser José Fuentes Lamas.

Informa tamén que recibida credencial con data 27 de abril de 2015 e unha vez cumpridos os requisitos legalmente aplicables procede darlle posesión como concelleiro desta Corporación.

De seguido, José Fuentes Lamas toma posesión do cargo de concelleiro, previo acto de acatamento á Constitución.

Rematado o acto formal de toma de posesión o novo concelleiro ocupa asento entre os seus compañeiros de Corporación.

Punto Segundo.- Toma de posesión como concelleira de María de la Concepción Penido López.

Informa o señor alcalde, **Santiago V. Amor Barreiro**, que o Pleno da Corporación en sesión celebrada o 26 de marzo 2015 tomou coñecemento da renuncia ao cargo de concelleiro de Bernardo Moar Míguez, pertencente ao Grupo Municipal Popular así como da renuncia anticipada a cubrir a vacante dos seguintes candidatos na lista na que se produciu a vacante, Camilo Rico Martínez e Alfredo Manuel Campos Lago.

Informa tamén que foi solicitada á Xunta Electoral Central a expedición da credencial a favor do seguinte candidato da lista na que se produciu a vacante que resultou ser María de la Concepción Penido López.

Informa tamén que recibida credencial con data 27 de abril de 2015 e unha vez cumpridos os requisitos legalmente aplicables, procede darlle posesión como concelleira desta Corporación.

De seguido, María de la Concepción Penido López toma posesión do cargo de concelleira, previo acto de acatamento á Constitución.

Rematado o acto formal de toma de posesión a nova concelleira ocupa asento entre os seus compañeiros de Corporación.

A) PARA DAR CONTA:

Punto Terceiro.- Dación de conta ao Pleno da Corporación dos decretos ditados pola Alcaldía dende a última sesión plenaria ordinaria.

O señor alcalde, **Santiago V. Amor Barreiro**, informa á Corporación que os decretos ditados pola Alcaldía dende a última sesión plenaria ordinaria, estiveron á disposición de todas/os as/os concelleiras/os na Secretaría Xeral, engadindo que o acceso aos decretos é libre para todas/os as/os concelleiras/os, en calquera momento na Secretaría Xeral do Concello, así como nos distintos departamentos nos que foron elaborados e que ditos decretos foron remitidos por vía telemática aos señores/as concelleiros/as.

Punto Cuarto.- Información periódica a render ao Pleno, en execución do acordo adoptado en data 26/08/2010: Execución do orzamento ao remate do 1º trimestre do exercicio 2015.

O señor alcalde, **Santiago V. Amor Barreiro**, da conta da información periódica a render ao Pleno, en execución do acordo adoptado en data 26/08/2010: execución do orzamento ao remate do 1º trimestre do exercicio 2015, de acordo co informe 86/2015 emitido en data 27 de abril de 2015 e a documentación en formato dixital que se xunta a aquel.

Punto Quinto.- Información ao pleno, en execución do disposto no artigo 4.3 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, informe sobre o cumprimento dos prazos previstos no artigo 216.4 do Real decreto lexislativo 3/2011, de 14 de novembro, polo que se aproba o texto refundido da Lei de contratos do sector público, para o pago das obrigas de cada Entidade local, correspondente ao 1º trimestre do exercicio 2015.

O señor alcalde, **Santiago V. Amor Barreiro**, da conta da información periódica a render ao Pleno, en execución do disposto no artigo 4.3 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, informe sobre o cumprimento dos prazos previstos no artigo 216.4 do Real decreto lexislativo 3/2011, de 14 de novembro, polo que se aproba o Texto Refundido da Lei de contratos do sector público, para o pago das obrigas de cada Entidade local, correspondente ao 1º trimestre do exercicio 2015 de acordo co informe 86/2015 de Intervención municipal,

emitido o 27 de abril de 2015, e a documentación en formato dixital que se xunta a aquel.

Punto Sexto.- Información ao pleno, en execución do disposto no artigo 5.4 da Lei 15/2010, do 5 de xullo, de modificación da Lei 3/2004, do 29 de decembro, pola que se establecen medidas de loita contra a morosidade nas operacións comerciais, relación de facturas que presentan unha demora na tramitación superior aos tres meses, correspondente ao 1º trimestre do exercicio 2015.

En relación a este punto, advírtese que as ultimas reformas legais aprobadas modifican a información a render con carácter trimestral ao Ministerio de Facenda e Administracións Públicas, a través das aplicacións informáticas habilitadas a tal efecto. Unha das principais modificacións é que na nova aplicación desaparece o formulario referente a *“facturas ou documentos xustificativos con respecto aos que transcorresen máis de tres meses dende a súa anotación no rexistro e non se tramitasen os correspondentes expedientes de recoñecemento de obrigas, ou se xustificara polo órgano xestor a ausencia de tramitación deste”*, o que motiva que se deixe de render a citada información.

B) PARA DELIBERACIÓN E ACORDO:

Punto Sétimo.- Aprobación, se procede, de actas anteriores.

Sometida a votación a acta da sesión do Pleno de 26 de marzo de 2015, resulta aprobada por **maioría absoluta** dos membros presentes, coa abstención dos concelleiros José Fuentes Lamas e María Concepción Penido López, por non ter estado presentes nesa sesión, e o voto favorable do resto dos/as concelleiros/as presentes.

Punto Oitavo.- Aprobación de proxecto técnico de obra de interese para o Concello de Ames: “Parque infantil no entorno da Travesía do Porto”.

(.....)

En relación a este punto da orde do día, o voceiro socialista, **José Miñones Conde**, solicita que este punto quede enriba da mesa.

Sometida a votación, a petición do voceiro do grupo municipal socialista José Miñones Conde de que o asunto quede enriba da mesa, a súa proposta resulta aceptada cos votos a favor dos 5 membros presentes do grupo municipal socialista e dos/as concelleiros/as non adscritos/as M^a Pilar Candocia Pita, Susana Mayo Redondo, Olalla Alvite del Río e Xosé Anxo Doval Rey, o voto en contra dos/as 4 concelleiros/as do grupo municipal popular, e dos concelleiros José Fuentes Lamas e María de la Concepción Penido López, e a abstención dos/as concelleiros/as non adscritos/as Ramón García Argibay, María Dolores Fernández Álvarez, Manuel J. Ferreiro Santiago, María González Gómez e Emilio Martínez Carballeira.

Punto Noveno.- Aprobación de proxecto técnico de obra de interese para o Concello de Ames: “Conexión ao polígono industrial dende a Avenida do Muíño Vello á estrada de Ventín (Milladoiro)”.

(.....)

Rematadas as intervencións, o Pleno da Corporación por unanimidade dos seus membros presentes, adopta os seguintes acordos:

Primeiro.- Aprobar o proxecto técnico denominado "Conexión ao polígono industrial dende a Avenida do Muíño Vello á estrada de Ventín (Milladoiro)", redactado polo Enxeñeiro de Camiños D. Julio C. Rojo Martínez, por importe de 144.878,53 euros.

Segundo.- Facultar ó alcalde presidente do Concello de Ames, para cantas actuacións de trámite sexan precisas, para a mellor execución do acordado.

Punto Décimo.- Addenda para a prórroga do convenio de colaboración entre o Consorcio Galego de Servizos de Igualdade e Benestar e o Concello de Ames para a construción dunha escola infantil no Concello de Ames (Bertamiráns).

(.....)

Rematadas as intervencións, o Pleno da Corporación por unanimidade dos seus membros presentes, adopta os seguintes acordos:

Primeiro.- Prestar aprobación á Addenda remitida polo Consorcio Galego de Servizos de Igualdade e Benestar, pola que se prorroga ata o 31 de decembro de 2015 o Convenio de Colaboración entre o Consorcio Galego de Servizos de Igualdade e Benestar e o Concello de Ames para a construción dunha escola infantil en Bertamiráns, concretamente no polígono APE-B7-06 de Ames.

Segundo.- Facultar ó alcalde presidente do Concello de Ames, para cantas actuacións de trámite sexan precisas para a mellor execución do acordado.

C) PARA CONTROL DO GOBERNO:

Rogos e Preguntas.

Intervén o concelleiro **Xosé Anxo Doval Rey**, para formular o seguinte rogo:

Primeiro rogo. Cando no pleno se presentan os informes do departamento económico, para dar conta da situación dos pagos e demais no correspondente trimestre, non hai posibilidade de intervir. Entón vou aproveitar este punto de rogos, para platear algunha cuestión que me chamou a atención. Unha das cuestións é que o informe de intervención sempre acaba, e vouno ler textualmente, "*A xuízo dos asinantes (interventor e tesoureira) do presente informe, tal información debería ser obxecto de publicación na paxina web municipal, sen prexuízo do uso adicional de outros medios para a súa difusión, se así se estima oportuno*". É dicir, estes dous funcionarios consideran que a información económica do Concello debería ser de acceso público, cuestión que desoe a Alcaldía. Como a desoe, eu vou facer algún comentario para deixar enriba da mesa cuestións que habitualmente o alcalde nega.

Fai algúns plenos, o alcalde daba o promedio de días de pagos á provedores, os cales estaban en pouco mais de 50 días, creo recordar que dicía. Vou ler tamén textualmente o informe do interventor sobre este asunto, para que non diga que manipulo: *Rateo das operacións pagadas no trimestre, é o indicador do numero de días promedio que se ten tardado en realizar os pagos. Tendo en conta o anterior, o rateo así calculado ten un valor de 87,84 días*. Na conta xeral do ano 2010 o pago a provedores era de 119 días, co que os 87,84 actuais están mais cerca deses 119 que dos 53 dos que falaba o alcalde recentemente. Ademais, na nosa opinión, acabamos de ter un remanente de tesourería relativamente importante e unha situación contable relativamente positiva, co cal sendo o primeiro trimestre ten menos explicación a tardanza en facer os pagos.

E nun segundo apartado esta o promedio dos pagos pendentes de realizar que nos da 26,97 días, que é o promedio do que queda por pagar; hai un millón seiscientos mil euros anteriores ao ano 2014 pendentes de pago, pero iso non se conta porque é un tema contable.

Claro, así de fácil nos da 26,97 días de promedio, porque se contamos o millón

seiscentos mil euros anteriores ao ano 2014, se iría a mais de 100 días, co cal eu creo que ten pouco do que vanagloriarse este goberno en canto a pago á provedores. Temos aínda facturas sen pagar, moitas delas son a Espina & Delfín pero non solo de Espina & Delfín. Postos a realizar algún rogo, eu rogaría que me explicara como hai meses a media de pagos era de 53 días, e agora é de case 88 días.

Intervén a concelleira **María Pilar Candocia Pita** para formular os seguintes rogos:

Segundo rogo.- Trasladar un rogo da ANPA do Instituto de Ames que quixo falar con vostede persoalmente pero nono conseguiron. Este rogo fágoo en nome do Partido Socialista e de Ames Novo porque así nolo indicaron dende a ANPA. Vou ler o escrito que manda a ANPA porque é moi claro:

En colaboración coas ANPAS dos CEIP Val da Maía, Barouta e Agro do Muíño, e de xeito consensuado, enviouse unha circular solicitando firmas de apoio para requirir ás autoridades pertinentes a adopción de medidas axeitadas.

A normativa para o uso do transporte escolar exclúe a moitos alumnos e alumnas que realizan o traxecto a pé ata o instituto, que está afastado da zona urbana. A flexibilidade na aplicación desta normativa sería ben acollida pola comunidade educativa. Queremos reiterar que a nosa postura defende que todos os alumnos/as do Centro, sen excepción, deberían ter a posibilidade de utilizar transporte escolar.

A falta transporte escolar para os alumnos que residen a unha distancia inferior a 2 km do instituto, obriga a moitos pais e nais a trasladar a os seus fillos/as en vehículos particulares, especialmente en días con condicións meteorolóxicas adversas, o que incrementa o tráfico nos accesos ao instituto. Isto motiva situacións como:

- Coches estacionados en dobre fila, invadindo parte do carril da estrada AC-544.
- Condutores que non sempre observan as normas máis elementais de precaución ao circular poñendo en perigo a integridade física dos alumnos/as que se ven obrigados a transitar por en medio dos coches, especialmente en horario de saída.

En xeral:

1. A zona peonil, mal sinalizada, é insuficiente para os mais de 600 alumnos/as que a desbordan amplamente. O Concello colocou recentemente unhas barreiras metálicas para sinalizala, pero segue sendo insuficiente para a cantidade de alumnos/as que na saída e entrada acceden.
2. A zona de embarque dos autobuses non está ben acondicionada. Os autobuses, en mais dunha ocasión teñen que sortear ao alumnado e aos vehículos mal aparcados para poder estacionar.
3. Hai vehículos que non respectan o paso de peóns situado fronte ao CEIP porque non diminúen a velocidade (non hai sistemas de redución da velocidade), ou por falla de visibilidade (días escuros). Sería conveniente instalar pasos de peóns elevados, semáforos con botón para peóns ou outras medidas.

Están solicitadas por escrito reunións co Xefe do Servizo da Axencia Galega de Infraestruturas, co Xefe Territorial de Educación e co Alcalde do Concello de Ames, para expoñerlles toda a situación e solicitarlles a adopción de medidas adecuadas.

Trouxéronos esta petición e trasladámoslla en forma de rogo neste pleno para que os

atenda e se reúna con eles. Unha vez mais, os veciños abandonados, neste caso, a comunidade escolar. O problema é moi grave e require de medidas por parte do Concello pero tamén require de medidas por parte da Consellería. O Concello o que ten que facer é acompañar á comunidade escolar nestas medidas que é o que nos están demandando eles. A nos parécenos gravísimo que non se responda a unha solicitude de cita dunha ANPA, cando esta poñendo de manifesto que hai un problema gravísimo de inseguridade, do que xa temos falado neste pleno un montón de veces, e que se nos ten dito polo goberno que se está buscando a solución.

Eu esta maña fun ao instituto, non porque fora a mirar o que puxestes senón porque me tocaba ir como nai co meu fillo, e efectivamente queda estreitísimo entre as marquesiñas, hai un espazo estreitísimo para que saian 600 rapaces desas idades, que como di un amigo meu "son hormonas con patas". É moi difícil pretender que vaian todos como se foran militares por ese espazo tan pequeno que se habilita para pasar, en todo caso, mesmo as marquesiñas que están colocadas alí dende o principio porque os buses paraban noutro lado, agora incluso non se sabe moi ben para que serven. Isto necesita sentarse e buscar unha solución, que probablemente non sexa doada e que probablemente custe diñeiro, nono dubido, pero o primeiro que hai que buscar é a seguridade dos nosos nenos e nenas, é fundamental. Na primeira parte do escrito faciase referencia a que hai unha parte de nenos de Bertamiráns que este ano, por primeira vez, quedaron sen transporte. O Valedor do Pobo aceptou a tramite a súa reclamación que ningunha administración atendeu. Son os nenos da entrada de Bertamiráns que están a mesma distancia ou incluso a mais que os de Chavian; uns teñen transporte escolar e outros non. Non é o maior dos problema que se fagan diferencias entre uns e outros, que é un problema, senón que o maior problema é que se empeza quitándolles a uns e se remata quintándollo a todo Bertamiráns, que é a finalidade que busca a Consellería, e senón actuamos de maneira unánime a comunidade escolar, a sociedade e as institucións e neste caso o Concello, perderemos un tren que despois nos vai custar remontar, como xa pasou moitas veces. Así que lle rogo que atenda isto pola transcendencia que ten xa que non é unha cuestión menor.

Terceiro rogo.- É en relación á Travesía do Pedregal, eu xa falei con vostede para comunicarlle que os veciños estaban preocupados. Estaban recollendo firmas para que por favor falara con eles, e vostede contestoume que había un informe da policía local porque se estaba reformulando a rúa pero que non había ningunha decisión tomada, e eu transmitín iso aos veciños; se non me podo crer as palabras dun alcalde pois non sei que vou facer. En teoría, se un veciño me pregunta eu teño que contestar o que me di vostede, que é o alcalde. Onte ou antonte estaban empezando a sinalizar a rúa, eu nin sequera me vou a meter se esa rúa ten que ser de sentido único ou non. Como sempre, a orixe do problema é a incapacidade de sentarse a falar cos veciños e veciñas, de tentar buscar solucións conxuntas. Ademais, neste caso, hai un problema mais, hai un centro de saúde e unha parada de autobús escolar. Eu non sei como se vai a resolver o tema da parada de autobús escolar agora, no medio do curso, porque aínda quedan un par de meses. Tampouco sei como se vai a resolver a problemática do centro de saúde porque as ambulancias dan a volta alí. A parte de atrás do centro de saúde non esta habilitada e recórdolles que na parte de atrás do centro de saúde había un punto sucio que o creara o propio concello, onde se tiraban rastroxos de limpar os xardíns e escombros de obra. Cando se denunciou ante a Consellería efectivamente se limpou e se comprometeron a arranxalo para facer alí un parquin. En todo caso, o problema non é como ten que ser a rúa, o problema é que non se fala cos veciños e eles teñen que chegar a coller firmas porque non son atendidos.

Cuarto rogo.- É respecto á competición que houbo das escolas deportivas, na que se entregaron medallas, por suposto aos ganadores, como é normal. Pero a nos chéganos que houbo un grupo de rapaces non ganadores que recibiron medallas e outros non, non sabemos se é verdade ou non pero gustaríanos que nos explicase iso.

En todo caso, eu creo que as escolas deportivas teñen unha función de xenerar valores e hai cousas que custan moi pouco e igualan a todos e iso é, por exemplo, un diploma por ter participado. Aínda que non leves medalla, porque non gañaches, se saes cun diploma é coma si gañaras algo. Cunha medida tan sinxela se iguala e ao mesmo tempo xerese competitividade, porque os gañadores levan algo diferente. Facemos esta proposta ou rogo para que a partir de agora os nenos saian todos con algo na man, e non haxa tan claramente vencedores e vencidos; as escolas deportivas non teñen como finalidade a competición pura e dura, senón promover o deporte.

Intervén o **alcalde**, que di: Teño que corrixila ou polo menos dar a miña opinión. Vostede non esta dicindo a verdade das cousas, non sei se o di por descoñecemento, que pode ser, pero o di cun un fin de ensañamento e iso non me gusta nin llo permito, dona Pilar. Vamos a ver, o que vostede me dicía do instituto de Bertamiráns xa mo trasladaron dende a ANPA, representantes da ANPA do instituto de Bertamiráns. E xa puxemos unha reunión entre o Xefe Territorial de Educación e o Concello de Ames

Pregunta **Mª Pilar Candocia** ¿Cando a puxeron?. O outro día estivemos nun debate no que vostede non estivo pero estivo o seu compañeiro e non dixo nada.

Continua o **alcalde** que di: Dona Pilar, eu estou no meu turno, vostede xa falou antes, se quere, despois pode volver a falar. Se vostede trae unha información a este pleno traia actualizada, e se ten dúbidas pois polo menos diga -me parece que aínda non se reuniu-, pero é que eu xa me reúno e me vou volver a reunir porque é unha preocupación, unha preocupación que xa me dixo a ANPA que xa ven de lonxe, aínda incluso cando vostede era concelleira de educación. Todos intentaron facelo mellor posible para mellorar, e uns melloraron un pouco e outros melloraron outro pouco. Eu xa me reúno con eles e nos vamos volver reunir. Xa temos encamiñadas medidas e temos falado con carreteras da Xunta de Galicia, porque é unha estrada de titularidade autonómica, eu quero deixar iso enriba da mesa e quero que conste en acta que xa me reúno.

Do tema da Travesía do Pedregal, efectivamente uns veciños que están aquí hoxe presentes, presentaron firmas no día de onte e vamos pasalas ao departamento correspondente, para analizar a proposta que nos trasladan. Pero mire dona Pilar, vostede sabe que o proxecto desta rúa foi aprobado neste pleno e nese proxecto está toda a información de como vai quedar a rúa. Vostede tivo acceso a este proxecto e vostede sabía que ía a quedar nunha única dirección. Aquí se intentan facer as cousas para mellorar. A pesares de ter un proxecto xa aprobado, se hai unha petición dos veciños vaise a estudar a petición. Xa lle din traslado ao xefe da policía municipal para que valorase esa opción. Se os veciños presentan un escrito vaise contestar.

En relación ao tema do autobús escolar nesa rúa, aínda estiven reunido co director do colexio Agro do Muíño que é o que lle afecta esa ruta, e non hai ningún problema co transporte escolar, é mais, vamos a poñer unha marquesiña onde está a entidade bancaria BBVA, porque non había marquesiña e vamos a establecer alí unha marquesiña para mellorar, non so para os alumnos senón para a xente que use outro tipo de transporte. ¡Problemas!, ao mellor se queren buscar problemas, pero intentamos dar solucións.

En relación ao tema das medallas a min non me consta pero preguntaremos. Pero é mais, dende fai dúas edicións na carreira pedestre deste concello, aos nenos se lles da unha medalla, a tódolos nenos pequenos. Vostede fala de que todos leven algo e

levamos dúas edicións recoñecéndolle o mérito aos nenos mais pequenos. Aínda que para eles non sexa unha carreira moi competitiva, ao final os nenos corren, pasan un día deportivo e de ledicia e lles damos unha medalla porque entendemos que polo menos levan algo e os motivas para que volvan correr ao ano seguinte.

Intervén **M^a Pilar Candocia**, que di: Pero estaba falando das escolas deportivas.

Contesta o **alcalde**: Non creo que se fixera esa distinción da que vostede fala e se se fixo preguntaremos a razón.

Continua **M^a Pilar Candocia**, que di: O que si é certo e que so houbo medallas para os que gañaron e o resto non levaron nada. O que nos din é que algúns dos que non gañaron tamén levaron medalla, iso si seria preocupante.

No primeiro tema, eu estou trasladando unha proposta que trouxo a ANPA e que solicitou que a tratáramos aquí, e a día de hoxe a ANPA non nos chamou para dicirnos que variara a situación, polo tanto, non é que eu queira manipular nada porque será que non hai cousas que traer. A min a ANPA me traslada isto, e este luns houbo un debate no cole onde estaba a ANPA do instituto e plantexou este tema e estaba alí o seu compañeiro Alberto Piñeiro, o número dous da súa lista e alí mesmo dixeron que non os recibiran, e estamos a xoves; aínda non veño tan mal informada, e non estaba eu sola, estaban os meus compañeiros e estaban os candidatos das outras forzas políticas que se presentan.

Eu xa sei que o problema ven de vello o que pasa é que ese problema se acrecenta cada vez que o centro medra e medrou moito nos últimos tempos. Eu fun concelleira do 2003 ao 2006, e no 2007 abriu Agro do Muíño, que tamén mandan nenos a este centro. Cada vez o centro ten mais nenos e cada vez hai mais problemas alí. Ademais, eu preguntei a quen era o seu concelleiro de educación en moitos plenos desta corporación, sobre unha proposta que había, que ademais estivo intentando retomar o concelleiro Alfonso cando foi concelleiro de educación; consistía en ver unha posible ubicación na parte de atrás. Pregunteille ao concelleiro de educación en diversas ocasións, porque niso era no que se estaba traballando cando eu fun concelleira, en 3 anos non se pode resolver todo. Ademais, eu non decidín poñer ese centro aí, ese centro estaba en Chavián e non fun eu nin ningunha corporación na que eu estiven a que decidiu poñer ese centro aí. Cando eu entrei como concelleira ese centro xa estaba onde está agora, polo tanto, non se trata "y tu mas, y tu mas", o que hai é un problema e hai que resolvelo. Non teño ningunha intención en meterlle un dedo no ollo no ultimo pleno, total que mais dará xa lle metín bastantes, non se trata de iso. Se trata de que cando se traballa durante todo o ano non fai falta facelo o ultimo día, esa é a diferenza. Eu xa fixen o meu traballo durante todo o ano, en todo caso trasladamos unha petición da ANPA, e non a traslado eu soa xa que é tamén en nome do Grupo Socialista. Cando viñeron onde nos, pediron que o meteramos conxuntamente os dous, e así o fixemos. E, en todo caso, a min non me chamaron e parece que aos compañeiros do PSOE tampouco, polo tanto, eu paso a pregunta tal e como a manda a ANPA.

Con respecto á Travesía de Pedregal o problema non é que había un proxecto e que ía así, o problema é que hai unha reacción veciñal a un proxecto e entón hai que falar con eles, a política non é unha liña recta, o aprobo e o fago; se hai un problema polo medio, é igual que cando estas facendo unha estrada e aparece un problema xeolóxico, non podes saltalo senón que hai que resolvelo. Se hai un problema veciñal non hai que esperar a que recollan firmas para resolvelo.

Á respecto da parada de autobús foi algo que eu tamén pensei, se hai un bus que vai dar a volta pois a ver que se fai con ese bus. E o problema das ambulancias é un problema real porque por aí non dan a volta. Ademais están tódolos usuarios do centro de saúde que saen por aí para ir á farmacia, non é o meu caso que eu non son usuaria desa farmacia pero vamos sei que hai moitos que o son. Os proxectos non son

palabra de deus porque se cambian montóns de veces e si hai un grupo de persoas que manifestan que queren que se poñan sobre a mesa e se fale con eles e se busque unha solución, pois non me parece que sexa unha cousa doutro mundo falar

Intervén o **alcalde** que di: Evidentemente, comentarlle que a parte traseira do centro de saúde, como vostede tamén saberá, foi un proxecto que se aprobou neste pleno e xa está licitado, como se recolle nas actas. Hai unha adxudicación provisional e se executara en breve esa traseira do centro de saúde, onde vostede dicía que se acumulaban moitas veces restos. Quero dicir que iso esta recollido nun proxecto que xa se aprobou neste pleno e que se vai arranxar de maneira inmediata.

Intervén o concelleiro **Ramón García Argibay** para formular o seguinte rogo:

Sexto rogo.- Eu quería rogarlle por enesima vez que nos de os informes de Intervención que levamos pedindo desde fai mais dun ano, en relación aos expedientes de reparo, e rogo que o faga antes de que remate o mandato porque xa vai ala mais dun ano ou ano e medio que o temos solicitado.

Intervén o concelleiro **José M. Miñones Conde** para formular o seguinte rogo:

Sétimo rogo.- No referente ao IES é algo conxunto que traíamos con Ames Novo. So dicir unha cousa, nos o que facemos é reunirmos coas ANPAS, escoitar as ANPAS e trasladar o que nos piden as ANPAS. É unha magoa que esteamos a falar deste asunto cando hai tres días (o luns) tivemos precisamente unha oportunidade de ouro para falar diso e é unha mágoa que vostede non estivese alí naquel debate porque entón podería escoitar de primeira man o que estaban dicíndolle as ANPAS e o que dixeron; o dixeron moi alto e claro, que o alcalde non os recibía. Que dende o luns resulta que a raíz do debate, imaxino que o compañeiro Alberto lle trasladou esa demanda que tiñan as ANPAS, que a tiña xa por escrito vostede, e accedeu a reunirse con eles, benvido sexa, pero a nos non nos comunican nada, polo tanto, o que facemos é o que nos pediron, que traslademos a necesidade de facer esa reunión. Imaxino que sería ao día seguinte, pero benvido sexa.

Intervén o **alcalde** para dicir: Non. Ao que **José Miñones** di: ¿Non foi o martes?, sería o mércores, entre un dos dous días tivo que ser. Contesta o **alcalde**: Cando puideron.

Continua **José Miñones**: Pois xa temos a información porque non hai como falar con eles, ten vostede convocada unha reunión con eles, ¿non falou aínda vostede con eles?. Contesta o **alcalde**: Xa tiven unha reunión con eles e teño convocada outra.

Pregunta **José Miñones**: ¿Esa reunión xa a tiveron?. Contesta o **alcalde**: Tiven unha primeira reunión con eles. Pregunta **Pilar Candocia**: A primeira, ¿cando?. Contesta o **alcalde**: Esta semana con dous representantes da ANPA. Pregunta **José Miñones**: ¿Esta semana, entre o martes e o mércores?. Contesta o **alcalde**: É que xa temos convocada outra co delegado de Educación.

Continua co seu rogo **Jose Miñones**: a presidenta da ANPA dixo: *Ola, falamos con él o martes para concretar unha data, quedou de recibirnos o vindeiro mércores as 10:00 da mañá.*

Intervén o **alcalde** para dicir: Entón Pilar corrobora a información que eu lle dixen aquí, que conste en acta que me reunín con dous representantes de ANPA esta semana.

Continua **José Miñones**: É o de menos, a magoa repito e reitero é que non estivera o luns alí para escoitar de primeira man porque xa houbese tido a reunión e non

necesitaba perder o mércores para volveirse a reunir sobre o mesmo. Dende logo, non é unha reunión que pidan de onte é unha reunión que leva moitos días e moitas semanas pedida.

O rogo ía un pouco a raíz disto. Non é so a ANPA do C.E.I.P A Maia, xa no pleno anterior rogueille que recibira a ANPA de Ventín que tiña solicitada dende hai tempo unha reunión, e seguen sen ter cita.

Resposta o **alcalde**: Actualice a información. Contesta **José Miñones**: a verdade, prefiro crer as ANPAS que a vostede; polo tanto, seguimos trasladando a necesidade de que se reúna coa ANPA de Ventín, que nos saibamos non tivo lugar a reunión e por iso o seguimos rogando.

Intervén a concelleira **Begoña Gómez Barreiro** para formular o seguinte rogo:

Oitavo rogo.- É en relación á Travesía do Pedregal. Rogo que se reúna cos veciños. Aínda que houbera un proxecto e se aprobara no pleno iso non quita que se reúna cos veciños e fale con eles. O mellor explicando porque se fan as cousas cambian de idea, porque senón se lles explican as cousas o toman a mal porque pensan que é un ataque a súa forma de vida; o único que queren son explicacións, nada mais, non é tan difícil.

Preguntas:

Intervén o concelleiro **Xosé Anxo Doval Rey** para formular as seguintes preguntas:

Primeira pregunta.- A raíz da súa intervención sobre a rúa Pedregal e como están os veciños presentes gustárame manifestar que tanto neste coma noutros proxectos de obras, a nosa preocupación é sempre que se planifique. Senón, que se fale cos veciños antes de levar a cabo un proxecto de obras, esa é a nosa opción. Por iso nos abtemos cando non se falan os proxectos cos veciños e veciñas. Vostede di que xa foi aprobado no pleno e que polo tanto xa o sabiamos, claro que o sabiamos, pero no seu momento abstivémonos. Xa lle pedimos, non agora, senón moitas veces, que antes de facer un proxecto de obras se fale cos veciños, esa é a nosa postura sempre. Pregunto si foi así con ocasión do proxecto da rúa Pedregal.

Segunda pregunta.- Esta xa a fixen por escrito, varios días antes do pleno, para que tivera ocasión de contestarme hoxe. Xa vai para dous meses que se adxudicaron as obras da bancada do campo de fútbol de Milladoiro e as obras seguen sen comezar. A pregunta é ¿cales son as razóns?.

Terceira pregunta.- No último mes e en distintas partes do Concello véñense producindo abonos con lodos procedentes de depuradoras. Nesas fincas posteriormente sementan con millo, probablemente transxénico. Segundo o decreto 125/2012, do 10 de maio, polo que se regula a utilización de lodos de depuradora no ámbito do sector agrario na Comunidade Autónoma de Galicia, para poder realizar este tipo de abonos precísanse unha serie de autorizacións e condicións de tratamento deses lodos, que non parece que se cumpriran nestes casos.

A pregunta é ¿interesouse a Alcaldía diante da Secretaría Xeral de Calidade e Avaliación Ambiental polo cumprimento da normativa por parte de quenes realizaron esas tarefas?. Se non é así, pedimos que coa maior urxencia faga a xestión, xa que a contaminación dos solos e das augas (algúns deses abonados realizáronse en fincas polas que pasan ríos e regatos) pode ser de gravidade.

Intervén o **alcalde**, para dicir: Do tema das gradas do campo de fútbol de Milladoiro, están en conversas a dirección técnica e a adxudicataria para tentar de resolver temas relacionados con solucións construtivas; iso é o que me trasladan dende o departamento municipal correspondente. Pregunta **Anxo Doval**: ¿cando é posible que estean colocadas?. Contesta o **alcalde** : xa debían ter empezado pero están resolvendo asuntos técnicos, cando as resolan e podan comezar as obras o

comunicaremos.

Intervén a concelleira **Susana Mayo Redondo** para formular as seguintes preguntas:

Cuarta pregunta.- Voulle facer unha pregunta, en función do que responda fágolle unha solicitude. A pregunta é se consultaron o seu twitter onte, porque temos un veciño que comina a Ames Novo e a Populares de Ames a solucionarlle un problema. Como alude tamén aos populares pois por iso pregunto, pero como en todo caso tamén o dirixe a Ames Novo, quero trasladar a súa petición. Este veciño ten un problema porque lle confunden o seu número de telefono co dunha empresa que ten o coche hai dous anos. Creo que o tema telefónico non llo podemos solucionar dende o concello, pero se hai un coche que leva dous anos abandonado na rúa algo podemos facer. Como vostedes teñen a información ao igual ca nos en twitter pois non lla detallo, é mais, lle digo que por favor atenda ao veciño que promete non votarlle.

Quinta pregunta.- Esta aberta a licitación do servizo de conciliación Escola de Verán no Concello de Ames, e nesta ocasión faise a licitación por dous anos ca posibilidade de prorrogalo outras dúas tempadas, mais ben serían dous cursos porque son os períodos que utilizamos. Esta non é a practica habitual en Ames nos servizos conciliación. Nestes servizos a prestación vense licitando para cada ocasión, e esta practica se cambia nesta convocatoria e na nota de prensa que vostedes sacan din que se debe a que así se mellora o servizo ao tempo que se produce un aforro na prestación. Teño que dicirlle que cando vin esta frase pensei en Eugenia Martín directamente, porque a especialista deste goberno en vendernos grandes empresas que igual friten churros que atenden escolas deportivas ou outras cousas era Eugenia Martín e sempre aforraban cartos e melloraban o servizo. Claro, aos antecedentes me remito, saímos do refuxio de Bando e onde nos metemos por aforrar cartos?. Agora non temos un servizo de atención a animais domésticos perdidos ou abandonados. Saímos dun sistema de xestión de escolas deportivas e servizos de actividades deportivas que era mellorable, todo é mellorable sempre, e caemos no fiasco que temos agora, xestionado por Eulen, que mesmo tivo que ir a unha comisión de investigación. Dáme medo cando vostedes xuntan mellora no servizo con aforro na prestación, e a miña pregunta é : en qué se basean, en qué datos e en qué motivos técnicos ou económicos se basean vostedes para dicir que con este tipo de licitación vamos a mellorar o servizo e vamos a baixar o prezo da prestación?.

Intervén o concelleiro **Ramón García Argibay** para formular as seguintes preguntas:

Sexta pregunta.- Sabe vostede cando va a pasar a nova concesionaria da auga ao cobro o recibo que temos pendente? Non sabemos nada e a xente estanos preguntado.

Sétima pregunta.- Relacionado co tema dos consellos escolares nos que nos tiñamos representación. O outro día, falando con algúns dos que están nun consello escolar, que correspondíanos a nos, dicían que vostede foi ao consello escolar cando, de conformidade co acordado, correspondíanos a nos. E certo?.

Oitava pregunta.- Antes de que remate o mandato ten vostede intención de adicar a entidades sen fin de lucro aqueles cartos que os concelleiros de PactoXAmes renunciamos a cobrar?.

Intervén o **alcalde**, para dicir: Buscaremos esa información e contestaremos. Sobre todo o tema dos recibos do abastecemento de auga; o retraso ven motivado polos

problemas que tivemos porque a anterior concesionaria non facilitou a información correspondente, tal e como xa manifestamos nun medio de comunicación. Aínda así contestaremos.

Intervén **Ramón García**, que di: ¿E as outras cuestións?. Contesta o **alcalde**: tamén as contestaremos.

Intervén a concelleira **María González Gómez** para formular as seguintes preguntas:

Novena pregunta.- Eu quería preguntar ao alcalde ou a concelleira de igualdade, se estivera o interventor tamén sabería contestar, en qué estado se atopa ou que ocorreu coa subvención do CIM do ano 2013 e en qué situación está a subvención do ano 2014?.

Intervén o **alcalde**, que di: Preguntaremos e daremos traslado da información solicitada.

Intervén **María González**, que di: En caso de que houbera que haber feito a devolución pregunto polos motivos.

Resposta o **alcalde**: hai algún decreto onde figure que hai que devolve-lo?. Ao que **María González** contesta: por agora non, pero solicito que informe. O **alcalde** di: ah, falan de rumores.

E non habendo mais asuntos que tratar, o señor alcalde presidente deu por rematado o acto e levantou a sesión ás vinte e unha horas e quince minutos do día 30 de abril de 2015, de todo o que eu como secretaria certifico.

Visto e prace

A secretaria

O alcalde